

Paulsh EPHEBUS kuhtée akchiwakíialaxuahcheesh ala kuss baawaalaátdeehcheesh hinné koók.

Paulsh “Shóotaachi?” hek.

1 Akbaatatdía bii dúttak Christ Jesus is bacheeiixpíluupeesh ko bii hawáhchek. Akbaatatdía is bilaxpáake Ephesus ak kooléesh díilum Christ Jesus ak kalátchekaashdaacheesh hinné díiluss baawalaátdeewahchek. Paul huuash bíik.

²Hilíssheekaateen Baksáaush Akbaatatdía dak Baxxiilaatúua Jesus Christ dii daásdealakuuak an dii bilaxpáakuuash baakoon ítche dii dahkúhcheoh.

Paulsh Akbaatatdía kuss chiwakáak “Ahóoh.” hek.

³Akbaatatdía dáashe báaxxiwaawook. Christ awáxpak balee hawátkaatahkaak báakukkoko baa ítche xaxúa bilikkuuák baláaxuua kuxshiwíak ii Akbaatatdía balee baa áatchilakaashihchek. Heem Baxxiilaatúua Jesus Christ Iilápxe is Akbaatatdía kúh kóosh kuss “Ahóoh.” baawook.

⁴Kooták. Akbaatatdía kootáa hinna awé it diasséesh kukaa Christ balee hawátkaatahcheesh ii balee is bilaxpáakahchek. Kooták balee baaxpáak balee al iháatdeetdak hiliachik. Kootaléesh kootáa Akbaatatdía balee íchissheesh ⁵kalako ii daáskootak Jesus Christ chúuss baa hilák balee dáakeewiak.

Baa daasalakootéesh koóm koochéek. ⁶⁻⁸Ikaak Akbaatatdía dáakbachee húuhchem is íile ala xéhche ii balee kak íaschilak kal ii dúuhpee balee is dáatchessaak. Kootáa ammaa ala kxawíanniawuuash kalaaxtawilikkuúk. Akbaatatdía ammaa an díawilikkuuash Dáakbacheem íchissheesh chúuss baa hilák an balee íchisse an balee daásdee ii íilaa bilikkuúk. Heem dáashe báaxxiwaawook. Balee anníihiissaahtaa Akbaatatdía an balee baa áatchilakaashihche baatcháachiwík. Kannaa balee daásdeeak kootáa balee kalaaxtawilikkuúk. Heem dáashe báaxxiwaak kusséesh “Ahóoh.” baawiiilush daachik. Baatách xaxúa éhchekaasak dasshuuwíssaak ⁹Akbaatatdía baa íkuchkam xíakaatchehtaa hilaakée ko ammaa íkuchkeesh balee éhchehchek. Daáskootak Christ chúuss baa hilák an baa íkuchkeesh kuhtaa díawiak. Haak daasalakootéesh koochéihmaachik. ¹⁰Al íkuxxaawishdak Akbaatatdía ammaa íkuchkeesh díawiak. Ammaa íkuchkeesh hinné koók. Baaiiwaakoochihtéesh koon dak awé áakeen baatách xaxuatáahilia dúttak Christ is bacheeíttuaa koóhcheihmaachik. ¹¹Akbaatatdía baatách xaxuatáahile daasalakootéesh kootáhcheik. Haak íisko hinna ammaa íkuchkeesh Christ balee hawátkaatahkaak ii balee dúttak is bilaxpáakeesh ko balee hawáhchek. Akbaatatdía daasalakootéesh koók. ¹²Jews biiluchiikáa ak baa iléesh ak huuwíash baawíish baliachkaatbaak awóoluuk. Heem Akbaatatdía balee chúuss baa hilák bilaxpáake hawéese dáashe dak an baatcháache dak báaxxiiahchewiak. ¹³Baleiichiweeítcheesh baa ala koottáahiluum al ii iláaush an díikukkuuash hilaakée Christ dáhkalattuuk. Heem Akbaatatdía dii ihch aahiiák is bilaxpáake dii hawáhkaak Baleiláaxbaaxpee dákuuk. Kúmmaam alóoshdak Akbaatatdía kan dii aáush ii xíassaahchek. ¹⁴Akbaatatdía Iláaxbaaxpee balee axúa awúualeesh ii ammaa bilikkuuwíash bulutchíwohmaachim éwahchekaasuuk. Akbaatatdía is bilaxpáake kuluschiwíam kal ii dúuhpee balee is dáatchessaaohmaachim kúh balee éhchekaashihchek. Heem alasáashiiwaaxpeesh báaxxiwaawook.

Paulsh ala chiwakía

¹⁵Akbaatatdía baatách xaxúa díalassheen Baxxiilaatúua Jesus an dáhkalatchekaasuush dak is bilaxpáake al

aláchissalakuuash an biikukkúwasseesh kukáakan
 16-17 bahchiwakíitatche Akbaatatdía kusseeé “Ahóoh.”
 baawalákuiluk. Tak Akbaatatdía baatcháachiwík. Haak Jesus
 Christ Iilápxe koók. Alasáashiiwaaxpee baa iíschiiisaaleetak.
 Bahchiwakíitatche dii bahkalaaxtássaailuk. Akbaatatdía
 baakaalák kuss hilíasheweaak. “Diláaxbaaxpeesh an
 baa éhkuuash áxpihchehkaah. Kanna ii dii éhkuulak
 baliachik.” baak. 18 Kúh hinné ii bahchiwakíik. Akbaatatdía
 baa dii éhchehchelak kalako ii baa íttuum dákbioosh
 élahchelohmaachik. Dii iláak dii is bilaxpáakeewiak. Heem
 baa ítche baatcháatum is bilaxpáake díakuuwiak dákbioosh
 díiwaachissaak ólaalah. 19 Haak hinné ii bahchiwakíik. An
 baatcháachkaashim baa íhchiisaaleettaahileesh balee axúa
 awúualam ii baa díawuuash élahchetaahinnohmaachik.
 Hinna an baatcháacheesh kalako ii 20 Christ bale shée koon
 chiléhkaak Baaiiwaakoochihtéesh koon Iilápxe ilapáko
 awáachihchelak ii chikittaakuuák bacheeítchihchek.
 21 Hilaakée Christ kal is bacheeítchikaasua koók awáxe kuhtée
 bale iláaxshiishiaahe xaxuatáhilia an baatcháatbisak an
 bacheeítchiwisheesh. Hileen iisássee dáashe baa íhchiisaaleetak
 baa baatcháacheesh koóihmaachik. 22 Akbaatatdía baatách
 xaxúa Christ itbúuan dúushiik. Kooták. Baatách xaxúa
 bacheeítchihchek. Heem akchiwakíia xaxúa Axxiilaatúuash
 koók. 23 Kúmmaam is bilaxpáakeesh xaxúa Christ axúa bíilulak
 ko kala kooták. Akchiwakíia xaxúa páataahawate Christ ii
 ákkuuwik. Heem baatách xaxuatáhilia ílala baa ákkuuweek.

**Akbaatatdía an balee daásdeewilikkuuash
 ii balee iléelik.**

2 Diiluk baapammasshipúua Akbaatatdía díikukkussaak
 baa ala kxawíiannialuua ii dásuulak ko kala kooták.
 Heehata hilaakée Akbaatatdía dii bilaxpáakahkuuk.
 2 Koottaléesh hinna awé áake baa ala kxawíia ko píisshe
 daláak hileen baleiláaxxawaaum awáxe ak kooléesh is
 bacheeítchikaasua ko ilílahkalattuuk. Akbaatatdía al
 ilíia ak díasseesh kon hawasséek. 3 Heelom Jews biixaxúa
 bassée dii ala kootúuash bíiluh balee koottáahilik. Bíiluh
 balee axúa dak ammaa bashihtúuash dak al ii díawuuash
 ii baapanmasshipúua balasanníaliawuuk. Bíiluh balee

bilaxpáakam ak baa kxawíahile xaxúa acháappaa Akbaatatdía bíiluh balee datchúshbiahtaa ⁴an balee daásdeekaashe dak an balee íchisshe baatcháache ii ⁵al ilíia it díawaassaak baasúulak ko kala kootáhtaa balee ilíiak balee bilaxpáakahchem Christ awáxpak. Dii anníhiissuuhtaa an dii daásdeekakuu kuttáche kalako ii dii ilíiok. ⁶Haak Akbaatatdía Christ Jesus an balee hawátkaatahcheesh kalako ii awáxpak balee chiléhkaak baapéem Baaiiwaakoochihtéesh koon awáxpak balee baa íkuchkahchewiak. ⁷Christ Jesus ala chúuss baa hilák an balee daásdee ii xássaahkaak bilaxpáake xaxúa an daásdeewilikkuu an baatcháachkaashe éhkuua ii baa koochihtalák hiliachik. ⁸Akbaatatdía dii íchissak dii daásdeekakuuk. Jesus Christ kala dahkalattaáheesh ko ii dii ilíiok. Akbaatatdía ammaa dákuuash koók. Díilaa ammaa díaluuash ko ii kootássaak. ⁹Baaleettáahilik. Hinna íwahkootéesh kalako ii bilaxpáakkootaa ilíiwaaiseewioolak baaleetak. ¹⁰Akbaatatdía hilaakée balee ala kooté kon díak. Christ Jesus awáxpak balee hawátkaateesh ko ii balee kaka bishíhkaak balee bilaxpáakshoohkalak baa íttuum kal ákkuuwiiawilikkuuash ko díawuulak hiliachik.

**Jews kootéesh dak ak kootásseesh dak
Christ kon balee hawátahchek.**

¹¹Baapammasshipúuash Jews kootéesh Jews ak kootásseesh an dii bisúuash dii ii iláaut “Akbaatatdía is bilaxpáake kussuuk.” heiluk. Haak ihch ii iláaut “Akbaatatdía is bilaxpáake bíiluk.” heiluk. Heehtaa iwak al iláaush al aaiáxtaau kootám kon díoosh ii ilíitaahiliiluk. ¹²Christ dii baaláhkassuash chichéhkaalah. Alachilakappéesh dii hawássuuk. Akbaatatdía baa íkuchkitche dak ihchi baa ímmiteesh dii baaláhkassuuk. Akbaatatdía dáalaaxtuuash ii ammaa kuss díikussaauleetak. ¹³Baapammasshipúuash Akbaatatdía dii koosáhtassuuk. Heehtaa hilaakée Akbaatatdía kon dii ihchi koosáhtakaatahkuuk. Ischawúuan Dakkaasúua is íle xéhkaak saalákuuash ko ii dii áxpak ihchi hawátkaatchek. ¹⁴Ischawúuan Dakkaasúua iiaxúa Jews kooté dak ak kootássee dak bach aahiiák hawátkaatcheesh kalako ii baakoon ítche balee bach áxpak daachíhchek. Baawatbakáleesh koon saawilikkuuash ii an bat bulupíiosh

haawéek. Hinna bale baa dúupiash ii balee dúuppeek. Kúmmaam binnaxchéem koonák ii bat bas kootáau bakaáuk. ¹⁵Kooták. Ischawúuan Dakkaasúua saawilikkuúash ii Jews is baleilíiaakaxpissuuash dak ammaa íkuchke baa hawaátdeetchek. Ii koochéesh Jews kootéesh dak ak kootásseesh dak bilaxpáakhawatchewiak ihch átdehchewiak. Kootáak bilaxpáakkootaa ítche áaahkulak hiliachik. ¹⁶Baawatbakálaam koon shéesh ii Ischawúuan Dakkaasúua an bat bulupíooosh haawéek. Hinna baawatbakáleesh ii Jews kootéesh dak ak kootásseesh dak hawátkaatchewiak Akbaatatdía kuss aachishíwiak. ¹⁷Heem Christ húula baleiichiweéftcheesh ii baakoon iixaxúa ítche áalahkuuash dii chiwaalákuuk ísko biiluk Jews kootúum Akbaatatdía koosáhtakaateesh dak koottaléesh diiluk Jews ak kootássuum Akbaatatdía koosáhtassuuash. ¹⁸Ii koochéesh Christ ammaa díawilikkuuash kalako ii Baleiláaxbaaxpee kuttácheesh ii biixaxúa Jews kooté dak ak kootásseesh dak Iiláppe kuséé koowáte bahchiwakíwiawuulak kootíihmaachik. ¹⁹Heem kalako ii hilaakée diiluk Jews ak kootásseesh dii ashiháassuuk. Dii baa iháassuuk. Itchihk Akbaatatdía ammaa hawasséesh ko dii hawúuk. Kooták. Is bilaxpáake dii héeleeluuk. ²⁰Dii íkuxxache baáhpe ko kan dii kala kootúuk ii awaasúulioo. Ammaa áakeen ilúuash hileen bacheeiiaxpíluupeesh dak Akbaatatdía ammaihchiláakuuhcheesh xaxúa dak al ii baachimmíhkaak al ii baalaátuuash koók. Haak Christ Jesus iiaxuataáhileesh baáhpam awaasúuash ak dúuxaasheesh koók. ²¹Awaasúum kootáa koowáte dúuxaashim Baxxiilaatúuash hinna awaasúuash kannaa ihch áxpihkaak baapéem alachiwakáauashbaakkussahkeem ihchi chínnaakuulak ko kala kootíihmaachik. ²²Kooták. Akchiwakíia xaxúa bach aláxpak Christ kon dii ashhawátuuk. Haak Akbaatatdía Iláaxbaaxpee kan dii héeleeliohmaachik.

Paulsh Jews ak kootásseesh baa hilakuúk.

3 Hinna íwahkoteesh diiluk Jews ak kootásseesh baa díawaawalakuuash ii Christ Jesus ishkawáashe bíik. Kalako ii anmaalaxtúua bii ishkawúualak. ²Hinné élahchetaahiluuk. Akbaatatdía bii báasak bii baa díalakuhchewioosh ii bii daásdeeawakuk. ³Akbaatatdía

bale baa íkuchkim díam xíakaateesh bii éhchehkaak bii éhchekaashihchek. (Kooshtaachím kal ii díiluss baawalaáchik. ⁴Hileen an baawalaácheesh dáamnuulak ítchihmaachik. Heelak Akbaatatdía ammaa íkuchkam xíakaateesh al awákeesh alákaak élahchelohmaachik. Ko ammaa íkuchkeesh Christ díakuuk.) ⁵Kal ammasshipúua Akbaatatdía hinna baam xíakaatak beesh baa chiweéleetam alaaxtúuk. Heehtaa hilaakée Baleiláaxbaaxpee kal aaiikusták Bacheeiiaxpíluupuum Akbaatatdía chilakappéesh hawátuum kúh ihch iláakuuhcheesh ko éhchehchek. ⁶Haak hinné baam xíakaatak beesh koók. Baleiichiweeítcheesh ii Akbaatatdía Jews kootéesh ammaa díakuuash Jews ak kootásseesh kúh baaláhkuuk. Kan bilaxpáakkoohawateok. Akbaatatdía Jews kootéesh ala kuss ihchi baa ímmiteesh Christ Jesus chúuss baa hiléesh kúh Jews ak kootásseesh díakuuk.

⁷Akbaatatdía bii ishkawáassaak an baatcháacheesh ii bii díahcheesh ii bii daásdeewakak hinna Baleiichiweeítcheesh ii bii ilíihchek. ⁸Akbaatatdía is bilaxpáake héele ii háakkaashkaateesh bíik. Heehtaa bii báasak hinna Baleiichiweeítcheesh ii Christ al éwahkuuash ammaa buluttúua Jews ak kootásseesh bii chiweéhchek. Heehtaa baatcháache ii éwahchekaashbiawuulak baaleetak. ⁹Akbaatatdía bii báasak bale baa íkuchkam díash aaxualaachéesh ala kootáhchewia bilaxpáake xaxúa éhchehchewiak. Baa uhpawassáako Jesus Christ chúuss baa hilák baatách xaxuatáhilia díash heehtaa ammaa íkuchkeesh aaxuáhkaalaatak ¹⁰hilaakée akchiwakíia chúuss baa hilák báakukkoon bale iláaxshiishiaahe dak is bacheeíttuua baatcháacheesh Akbaatatdía ammaa éhchem baatách xaxúa an díash éhkuulak hiliachik. ¹¹Baa uhpawassáako Akbaatatdía bale baa íkuchkam ii baa koochihtéesh díak. Haak Baxxiilaatúua Christ Jesus chúuss baa hilák kootáhchek. ¹²Christ kan bahkaláttaak awáxpak balee hawátkaatahchek. Heem Akbaatatdía balee iikukkúihmaachim balásduupassuuk. Heem ishóoche bíwiawuulak an baa bulutchíittuuleetbohmaachik. ¹³Hinna íwahkoteesh kalako ii dii baawakíikaasuuk. An baawilísaawalakuua ii iáxxolessaalah. An dii baa áatchileesh ko díawaawalakuuk.

Paulsh Ephesian akchiwakíia chiwakáakuuk.

¹⁴ Akbaatatdía ammaa an día xaxúa basshihchít Baxxiilaatúua Jesus Christ Iilápxe ishóocheen bashúushpattak kuss bahchiwakíiik. ¹⁵ Bilaxpáakuum Baaiiwaakoochihtéesh kuhtée dak hinna awé áake ak kooléesh xaxúa an bilaxpáakuua alataawúua Akbaatatdía kuss dúttuuk. Achíssaalak bilaxpáakassaaohmaachik. ¹⁶ Akbaatatdía koóm Iláaxbaaxpee chúuss baa hilák baa eé baatcháache ahóom héeleen an baatcháache dak bale daasátchuche dákuulak dalásuua awúusseelak ii kuss bahchiwakíiik. ¹⁷ Christ an dáhkalattúua kúh ii bahchiwakíiik. Koótduulak Baleiláaxbaaxpee dalásuua awúuan daachíihmaachik. Koótdaassuulak koon daachíssaaihmaachik. Haak sáapdialuulak Akbaatatdía al aláchissuua dak an bach aláchissuuash ko ii koótduuk. Akian chiikúss ii díluuak ii iháass daléessaalohmaachik. ¹⁸ Hileén ii bahchiwakáawalakuuak élahchekaasuulak baliachik Christ an balee íchissheesh ala shúhkeesh dak ala háhkeesh dak an báakoosh dak an dáawuuash dak. Tak an balee íchissawilikkuuash baa íischiisaaleetawík. Hilíssheekaateen Baleiláaxbaaxpeesh an baatcháacheesh ii dii kuxsák akchiwakíiash díxaxua ammaa élahcheliilush daache dii éhchehcheoh. ¹⁹ Kooták. Christ an balee íchisse baatcháache ii éwahchetaahinmiawuulak baaleetahtaa kannaa éhchewiaalah. Koótduulak dalátaawuua Akbaatatdía ala kooté ko kala kootíihmaachik.

²⁰ An baatcháache baxúoo awúualeesh ii baa basshihtúua dak baa baakaalúua dak Akbaatatdía áxpíhkaawilikkuuwialak kootíihmaachik. ²¹ Akbaatatdía dáashe báaxxiwaawook. Akchiwakíia dak Christ Jesus dak chúuss baa hilák baa baatcháache ahníak. Heem is bilaxpáake xaxúa dáashe báaxxiiao ii baa koochihtíih. Ahóoh.

Akchiwakíia xaxúa hawátkaatdak ko kala kooták.

4 Hinna íwahkootéesh Baxxiilaatúuash ishkawáashe bíim hilaakée anmaalaxtúuashe bii ishkawúulak. Akbaatatdía dii dáasaasuulak an dii bilaxpáakiilush daacheesh dii chiwaáuk. Dii baawakáauk. Kootáalah.

²Sáapdialuulak xaxúa cheéshdaak baalíttaammikaattaalah. Baam sáapdak baakoon káalah. Sapéelak baa iháatdialak ilissáachissaa al aláchissuua ko óowiaalah. ³Akbaatatdía Iláaxbaaxpee kon dii bach aaliíak dii hawátkaattuuk. Heem baakoon bach aláxpak ítche áalahkuua ko ii dii koowáteeosh dúuxaasaalah. ⁴Baleiláaxbaaxpee hawátkaatak biixaxúa baxúoo awúualam ii bale axúa hawátkaatak ko kan balee kala kooták. Kúh Akbaatatdía balee dáasaasak an bíluss ihchi baa ímmiteesh ii baa íttuum kuttácheesh biixaxúa awóoliiluk. ⁵Biixaxúa Baxxiilaatúuash hawátkaatak. Biixaxúa an balee baachimmíhcheesh kuttáche bahkaláttuuk. Biixaxúa balee bilihphíche ii kootéesh kuttáchik. ⁶Akbaatatdía hawátkaateesh biixaxúa kuss bahchiwakáaum Baksáaush koók. Biixaxúa bas bacheeíttuua koók. Balee chúuss baa hilík. Iláaxbaaxpee biixaxúa baxúoo awúualak.

⁷Christ balee daásdeeawilikkuuak bale baa eéitchim ítcheesh ii íkuxxache balee dúmmachik. Ko baa ítcheesh an baatcháache ii Christ an daashíhche ii xíssaahchek. ⁸Baawaalaáchim Baaxpéesh Christ ii iláak hilíashiiok boh.

“Kootaléesh dáachee ahkaáshim kulusták
báakkussahke kuss aaléek.

Kúh is bilaxpáake baa dúmmachik.” huuk.

⁹(Hilaakée hileen bale al ilíia chilasshihtáalah.

“Báakkussahke kaka kuss chishíik.” huua sáapahkuulak akian iischiisáa awáss húula awé awuúkussahke híiash koók. ¹⁰Heem ak awáss húuash hinna ak báakuss déesh íh koók. Hinna awáxe ak chíisaataahilia báakkussahkeess déek. Heem hilaakée baatách xaxuatáahilia bacheeítcheesh ii annawitáahilihchewiak.) ¹¹Hilaakée hileen bale al ilíia dasshihtáalah. “Iiaxúa kúh ak baa dúmmacheesh koók.” Kooták. Báashik hám bacheeiiixpíluupeesh dak Akbaatatdía ammaailáakuuhcheesh hám baleiichiweeítcheesh ak ii ilíiash hám akchiwakíalaxuahche axxiilaatúua dak ak baa baachimmíhkuua dak. ¹²Iwak díak Akbaatatdía is bilaxpáake xaxúa baa ákkuuwuulak an báasheesh kúh kan díoolak hiliatak chiikúss akchiwakíiash Christ axúa koóush an baa kalátchekaasuaa aák áxpíhkuulak hiliachik. ¹³Heelak íwak ii biixaxúa balee bach koowáteeak an baa bahkaláttuush hawátkaatak. Akbaatatdía

Dáakbachee al éwahkuuash kúh hawátkaatak. Heelak an baa bahkaláttuuash kala hilaal kal an báakkussahke híihmaachik. Kúkkan balee baa annawitáahiliihmaachim Christ ko kan balee kala koottáahiliihmaachik.

¹⁴Heelak kal ii dúuhpee baakáatkaate ala kootúua balee kootássaaihmaachik kúmmaam bilé annaxxiché dak hútshiishiaahe dak kon balee shóosset aaléelak. Kooták. Kal ii dúuhpee baa sáapeet bahkalátchessuuk. Bilaxpáake ilíiitichikaatak ii balee kúassaak ii balee iháass aaléessaaohmaachik. ¹⁵Itchihk baa ala koottáhile ii baláak ko ii an bach awáchissuua awóowiak kalako ii Christ ala kooté kannaa balee kala kootíihmaachik. Akchiwakíia xaxúa Axxiilaatúuash koók. ¹⁶Hileen alaachíisee dak alashkúa ko ii balee axúa bach aalífak bat dúuxaashihkuuk. Ii íkuxxachia an baa hilíhkuua díoolak balee axúa ítche apáaliihmaachik. Akchiwakíiash an balee ala kootíiish daache koók. Iixaxúa bach íchissak ammaa hilíhkuua díoolak Christ an baatcháache ii akchiwakíialaxuahche ítche apáalak áxpihcheohmaachik.

**An balee bilaxpáake hilaakéesh ammaa
íkuchkeesh hileén koók.**

¹⁷Baxxiilaatúuash baláawakak hinné díiluss sheewáawík. Ak baa kalátcheleete ala kootúuash koochéessaalah. Kootéesh ammaa dasshihtúua kóoxissaak ii ihchi kuxsúuleetak. ¹⁸Haak iiwaalasshihtúuash óotchia ko kala kooták. Baa éhkuuleetak kootáa baa ala koottáhileesh éhchewiassuuk. Akbaatatdía an bilaxpáake kuuwíash baaláhkassuuk. ¹⁹Baa baaleete dak baa ala kooté dak kan dasshihtaachíssaak baa ilusshíchissuuk. Baa iháate ko díak balee aláxushkawaak baa ala kxawíishiishiaahe kannaa baatcháattaak kan baa hilúukook. ²⁰Heehtaa Christ ala kooté ii dii baachimmíhcheesh iháak. Iwak al ii élahcheesh kussaachichéek. ²¹Kooták. Jesus ala koottáhileesh kal an dáhkalattuuwasseesh kalakoon díhch an dilútchiliilush daache koó ii dii baachimmíhkuuk. ²²Iíska an dii bilaxpáakkxawaaush dak dalátaawikxawaaush dak ii díhchi xawíiluum dalásalakootuuash ii díhchi kúaluuash bitáaxiiluulak koó ii dii baálilaauk. ²³Akbaatatdía díhchi kummíleelahkuulak dalásuua dak iiwaaláasshihtuua kannaa

ítcheelahkuulak koó ii dii baachimmíhkuuk. ²⁴Haak an dii bilaxpáakuua hilaakám Akbaatatdía ala kootéesh ko dii kootáhchewiok. An díhch an dilúttuua ii bilaxpáake xaxúa kuss dii baa táttak dii annawák dii baaxpáaum éhcheohmaachik.

²⁵Heem bat shéess dii bísshissalah. Biixaxúa Christ axúash bíluk. Heem díxaxua baa ala koottáhileesh ko ak baa kalátcheesh kuss shiiáalah. ²⁶Baam dalásbahtuulak kalakoon aalasshipák ii baa kxawíiassalah. Haak an dalátaawixxawaaush it áxxaashe íwaxpissaa haawíialah. ²⁷Koótdaassuulak Chíisbishe dii kúak dii baa kxawíiannahchewioolak baalúussaaihmaachik. ²⁸Dii akbaaataalúulak kala koowíak baa hilák baa ítche ko díaalah. Bale baa hilé ko ii bilaxpáakdaalah. Koótduulak baa ihch alíinneete ii dáhkuxshiwialuulak kootíihmaachik. ²⁹Bale ilíikxawíia ii díassalah. Baa al ítche ko shiiáalah. Heelak bilaxpáake an baa kaláttuuash áxpilahchelohmaachik. Baam sáapdaht baa ítche ko shiiák ak dii iikukkúuash kuksák baa áatchilahcheohmaatdak diliataalah. ³⁰Deéla an dii an bilaxpáakuua ii Akbaatatdía Iláaxbaaxpee daásxawíiassalah. Baleiláaxbaaxpee dii áxpak koolíihmaache aa baapéem Akbaatatdía baa ala kxawíia koon dii kulustalákuuak dii iléehmaachik. Kooták. Baleiláaxbaaxpee alóoshdak ko kala kootéesh Akbaatatdía dii aáush ii xíssaak. ³¹Dii díakxawíiit an baa dáhkalaaxtalakussuuash dak an dalátaawixxawaaush ii dii daasáakaailuash dak baa an dáanniikxawíikaashdaailuash dak an dii bíssheesh dak baa an dilíiwisheesh dak baa baaík sheeláailuash dak bat dilúpioosh xaxúa kal ii dúuhpee koochéessaak kala koowíialah. ³²Itchihk bat daásdeekuuak bale alataáwitcheesh ko ii díaalah. Akbaatatdía kuk Christ ii baa hilák dii kalaaxtalákuuk buh. Heem bat shéessessee ammaa iháatdialuuash bach kalaaxtakuuáalah.

5 Akbaatatdía is bilaxpáake íchissheesh díilum ala koochéesh koótdewiaalah. ²Kooták. Christ saawilikkúuash ko ii an balee íchisshe balee éhchehchek. Ii saawilikkúuash ii Akbaatatdía baa ítchim kuuák ko daásitcheewiak. Sáapeem díawuulak ii an bach awáchissuuash Christ an balee íchissheesh ko kala kooták bach awóowiolak koók.

Ak baa kalátcheleete an baa hilúua dúusaalah.

³Akbaatatdía is bilaxpáake baaxpéesh díiluk. Heem “Dii héeluua hawátuum baa iháatdialaailuk aláxushkawíia díalaak an baa ilusshítialaak baa eétalachissuua.” íwahkoosheewioolak dii al ilíiwishbioolak aliilúuleetihmaachik. ⁴Haak baa ilusshítsheekisshe dak al ilíiwaalaaxe dak annawíssuuk. Itchiik Akbaatatdía kusseé ko “Ahóoh.” haalah. ⁵Ala kootáhíle élahchetaahiluuk. Sapéolahtaa aláxushkawíia díoolak an baa ilusshítidoolak baa eétichissuulak baafk chiwakíilitdelituulak Christ dak Akbaatatdía dak ammaa hawassíiosh baaláhkassuuk.

⁶Bale ilíiwaalaaxe ii dii kúawíoolak díassaalah. Akian baa ala kxawáaum ii balíash ko ii Akbaatatdía daaskawíia ii ak koochéé an datchúsua shíassaaihmaachik. ⁷Hinna íwahkootheesh kalako ii hileen ko ak bilikkúa díssaalah. ⁸⁻⁹Díiluh hawáttaa ala chihpashé dii koolúuk. Heehta hilaakée Baxxiilaatúuash is bilaxpáake dii héeleelum ala sáashiia daliíok. Ii íwahkoosheeweesh bilaxpáake ala sáashiia koolúulak alataawúuash íttak baa daásdeek baa ala kooté ko díailuk. Heem bilaxpáake hinna ala sáashiia ak kooléesh ala kootúua díiluh kootáalah. ¹⁰Deéla kala shóotduulak Akbaatatdía ammaa isítchee éhchewiak díaalah. ¹¹⁻¹²Baa ala kootássee bilaxpáake an díoosh ala chihpashé koolíilush daatak baa an díoo aaxuúxuaahuum dasshihtaachíssaalah. Kootáa ii bat shéess dílíssaaliilush daachik. Shóotdahtaa áakass dústaalah. ¹³Sáapdahtaa ala sáashiia aalaliíolak ala kooté ii xíassaak. Haak sáapdahtaa sáapdak ala kootáhíleesh áakass déhcheesh ala sáashiia koók. ¹⁴Iwak ii hilíashiiook. “Ak iháwe kan díttaah.

Bale shéesh koon chilaáh.

Koótdalak Christ ala sáashiia dii híihcheihmaachik.” huuk.

Haak sáapdahtaa Christ ala sáashiia ii xíassaahcheesh ala sáashiia ii sáashiihmaachik.

¹⁵An díhch an dílúttuua íassíiaalaha. Ak baa éhcheleetdessaalah. Itchiik ak baa éhche ala kootúua kootáalah. ¹⁶Hinna baapé baa ala kxawíia ahúk. Heem baa ítchilaawialuulak kala koók. ¹⁷Deéla ak baaláaxaatdessaalah.

Itchihk Baxxiilaatúuash ammaa dii díahkuua éhchewioolak díaalah. ¹⁸Bilikawíia ii káhuxchelessaalah. Ii díhchi kxawíilaalohmaachik. Itchihk Baleiláaxbaaxpee ko dilúttak díhchi hawasséehkaalah. ¹⁹Haak bat shéess diláaulak Buuwaaxpée (Psalms) dak iichiwakáauwuua dak ko ii díaalah. Dáawalaxuua ii Baxxiilaatúuash dáashe báaxxiiiaalah. ²⁰Baxxiilaatúua Jesus Christ dáasheesh ko ii Baksáau Akbaatatdía kusseé baatách xaxuatáhilia ii “Ahóoh.” haalah.

ak bach áxpe

²¹Haak Christ an dáhchikittuuash ko ii bach ilíikalattaalah.

²²Bía akchínmisheesh Baxxiilaatúuash al ilíiash an díaluuash dachílaau kúh kootáalah. Baxxiilaatúuash ala kootáhche koók. ²³Bía axxiilaatúua chilaáu koók. Akbaatatdía is bilaxpáake axxiilaatúua Christ koók. Kooták. Christ iixúia akchiwakíia ak iléesh koók. Christ axúia ko kala kootúuk. ²⁴Akchiwakíia díixaxua Christ ammaa ala shéesh baatách xaxúia díikukkak díalailuk. Heem bía kúh chilaáu al iláau iikukkúilush daachik.

²⁵Bacheé ilussheen duóo aláchishhiliish daacheesh Christ ak kalátcheesh al íchissheesh ko kala kooták. Hinné chichéhkaalah. Iilaa saakuuák ²⁶ko ak kalátcheesh bilihpíhcheesh ii hoowéettaak Baleiichiweéitche ii Akbaatatdía baaxpáhkaakuuwiak. ²⁷Heem akchiwakíia bíilu baa ala kxawíiash ii balee íaxxaaxiissaak balee xiípissaak balee baaxpáak an balee baa aaliíoleetiihmaachik. Kooták. Akchiwakíia bíilu balee dúttak ualák ko kan balee kala kootáhchewiak. ²⁸⁻³⁰Deéla bachéem axúia ihkulupíalal huua éwahkuuleetak. Kúh ii baxúoo bulupíassuuk. Kootáa itchihk baa duúshbahkaak hawassáawaak íchikaashbuuk. Deéla Christ ak kalátcheesh axúash koóum bíiluh balee hawák. Kooták axúia dak hulé dak. Heem Christ an balee íchissak an balee hawassée íchikaassheik. Kúh bachéem al ich íchisse uá al íchishhiish daacheesh koók. Bachéem uá íchishhilak íh ich íchishshik.

³¹Baawaalaáchim Baaxpéesh an baalaátuuash hilíashhiok.

“Kúh bachéem aksée íhchish dáak bíam áxpalak

kal axúoo hawátiohmaachik.

Heem kan bilaxpáakduuppeessuuk.

Kala koowáteeak hawátkaatiohmaachik.” huuk.

³²Ko íwahkoosheesh ii Baawaalaáchim Baaxpéesh awúuan ammaa koottáahilim baatcháachim bíiluss xíassaahchek. Awúuan an baalaátuuash Christ dak akchiwakíia ala kootúua balee chiweék. ³³Heehtaa kúh an dii baachimmíhche xíassaak. Bacheé xaxúa al ihch íchissuua uóo íchissuulak ko kala kootílush daachik. Haak bía xaxúa kúh chiláau chikitchéilush daachik.

baakáate dak aksáau dak

6 Baakáateen dáksaau al iláaush díaalah. Baxxiilaatúuash kal an dii díahkuua koók. Kal ala díalaaliilush daacheesh íwak koók. ²“Dáksaauush chikittáalah.” huuk. Baleilípilake héeleen Akbaatatdía dísee al ihchi baa ímmitee bassáakaasheesh hinné koók. ³“Koótduulak hinna awé áakeen al áalahkuuash báalee hámmishkaasheen ítche áalahkulohmaachik.” huuk.

⁴Bacheé ilusheen ak dáakbisheesh ammaa ala sheelúua dak ammaa an díaluua dak daláakuuash ii daaskawíiassaalah. Itchihk an baachimmílahkuuash dak an baánnilaauash dak al iiwíshduuash ii Baxxiilaatúuash kalátchekhaal.


baa ishkawáashe dak is bacheeítche dak

⁵Baa ishkawáasheen díis bacheeíttuua chikittaák ammaa ala sheé díaalah. Christ ammaa dii an díahkuua an díaluuash díis bacheeíttuua an baa díalaalakuuash ko kala kootáalah. ⁶An baa díaluua ítchiiaalah. Heehtaa díis bacheeíttuua an baa kalátchelachewialuua biipé kussaak. Itchihk dii íassiio xuh dii íasseessuulak an baa díaluua ítchiiaalah. Christ dii aáum Akbaatatdía an dii díashkuua díaalah. ⁷Baa hilák dalátaawuua al ítcheesh ko ii díak kúmamaam Baxxiilaatúuash ko baa díalaalakuulak bilaxpáake kussuuk. ⁸Hinné kalaaxtássaalah. An baa díaluua ítchiluulak chiikúss Baxxiilaatúuash ii íkuxxache bakálee díak balee baa ishkawáashi xuh baaleetak.

⁹Deéla bacheeítche ilusheen díiluh kan dii kala kootúuk. Díshkawaasheesh daásdeekuuaalah. Kuss xawíilessaalah. Hinné kalaaxtássaalah. Hawátam Baaiiwaakoochihtéesh ak kooléesh dii dak díshkawaasheesh dak díilapta kon dii aáuk. Bilaxpáake xaxúa al íkee bach kuxxáhchek.

Chísbishe al iichúuwua hinné koók.

10 Aaleéla Baxxiilaatúuash ii dii hawátkaatum an baatcháachkaashim baa íschiisaaleeteesh ii díhchi dalásatchuchihkaalah. 11 Bale dusshúuataalicheesh dak Akbaatatdía ammaa an dákuuash ihée dúttak ii díak ii



Ephesians 6.14-17

díhch íassiaalah. Koótduulak Dís kootáau Chíisbishe ammaa íkuchkam kxawíash ko dáawaluuwialuulak annúuwishiihmaachik. ¹²Bilaxpáake ko baawaluússuuk. Itchihk bacheeítcheesh dak an bacheeítchiwishe dak hinna ala chihpashé koon bacheeíttuash ko baawaluúok. Haak baleiláaxxawiishiishiaahe awáxe ko koolúuash ko baawaluúok. ¹³Aliilíhchiassaaluua Akbaatatdía dákuuash ii díalah. Baapéem baa ala kxawíam dii iichúluulak dii áxaawassuulak ii óochialahchewialuulak kootíihmaachik. Heem baa ala kxawíash ko baa baluúo koomnák it díluulohmaachik. ¹⁴Hinna íwahkoosheeweesh baatát díhch ákkuuwiiak káalah. Baa ala koottáhileesh ii díhch ákkuuwiaalah kúmmaam bale ipáhpachim díheelapeetaaluulak. An baa annámnahkuuash kon Chíisbishe dii híassaaihmaachik kúmmaam bale dusshúutaalichim ii díaluulak. ¹⁵Baleiichiweeítcheesh ko ii ítche áaahkuuash díwaachissaak chiwáalah kúmmaam disáhpuua ii díaluulak ii dalásatchutak díluulak. ¹⁶Sáapdahtaa Akbaatatdía an bíáluuash baatcháattaalah kúmmaam bíinnaatdak. Chíisbishe iseé biláawishishdak díluss húuhchelak ii chiálaawialuulak kootíihmaachik. ¹⁷Akbaatatdía dii iléesh an dáhchichelahkuua baa iháate diláaxuua híassaak kúmmaam bale ikkúhpuuwatdak dáashuuo ássassuulak. Akbaatatdía al ilíia ii díak ii Chíisbishe ko baluuáalah kúmmaam bítchiisaalak Baleiláaxbaaxpee dákuuash ko kala kooták.

¹⁸Ammaa an díaluuash héelapko chiwakáak Akbaatatdía díhchi kuxshíhkaalah. Sáapdialuulak Baleiláaxbaaxpee dii chiwaáut chiwakáalah. Baleiláaxbaaxpeesh ko díikukkak koowéessaataahilaalah. Akbaatatdía is bilaxpáake xaxúa chiwakáakuuakaalah. ¹⁹Kúh chiwakáawakaalah. Heelak balíilak Akbaatatdía kon bale ilíia bakdák baa ala koottáhileesh baa baachilíileettaa sheewáak Baleiichiweeítcheesh koon baa ala xíakaateesh ko bilaxpáake éhchewahchewiawaak. ²⁰Hilaakée anmaalaxtúuashe bii ishkawúalalak úuwatchilia bii kussíiohtaa Jesus Christ bii húuhchem baláawakak bilaxpáake ahóom Baleiichiweeítcheesh éhkuulak baliachik. Hinna Baleiichiweeítcheesh ala koottáhileesh baa baachilíileettaa ko baachiweelák chiwakáawakaalah.

Kalachii Paulsh “Shóotaachi?” hek.

²¹⁻²² Bakúpawachissuum Tychicus huuash Baxxiilaatúuash baa hilakuuá ihkúalassaak. Heem díluss déewahkaak dii kuxshíwahkaak hilihtée ammaa ala kooté dii chiwaáulak baliachik. Kúh bíilu an balee ala kooté dii chiweéohmaachik. Heelak ammaa an díawee an bii ala kooté ii élahchelohmaachik.

²³Hilíssheekaateen Baksáau Akbaatatdía dak Baxxiilaatúua Jesus Christ dak an bahchiwakáau ak koochéé xaxúa ítche daachíhcheoh. An baa dáhkalattuu baatcháachim dii bach íchisshihkaakaaoh. ²⁴Hilíssheekaateen díixaxua Baxxiilaatúua Jesus Christ ak íchissakaaush Akbaatatdía kon dii daásdeedalakuuoh. Ahóoh.